

Quāt melibee eut ouy toutes les paroles de dame prudence ⁊ ses sages enseignemens si fut en grant paix de cuer ⁊ loua dieu qui luy auoit donne si sage compaignie. Et quant vint la iournee que ses aduersaires comparurēt en la presence il parla a eulx moult doucemēt ⁊ dist. Ja coit ce se dist il que vous vous soyés portes enuers nous moult orgueilleuse mēt ⁊ celle iniure de grāt presumptiō vous soit aduenue ⁊ toutesuoyes la grāt humilite q̄ ie voy en vous nous cōstraint a vous faire grace. Et pource nous vous remettōs en nostre amitie et bonne grace ⁊ vous pardonnons tous les meffais ⁊ iniures que aues encontre nous perpetreez et faictez ⁊ priōs dieu de uotemēt quil le vous vueille pardonner par sa sainte misericorde ⁊ aussi quil nous vueille pardōner tous noz pechiez affin que nous puissions auoir la grace. Amen.

Ly finist lystoire de melibee
⁊ de prudence sa femme.